

Monday, November 3, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

DAMPA BY-ELECTION

Vawiin khan Dampa bial By-Election atana Postal Ballot hmanga vote thlak tan a ni.

Vote hi Returning Officer office-ah thlak a ni a, Postal Ballot hmanga vote thlak hi zing dar 9:00 atanga tlailam dar 4:00 thleng hun hawn a ni a, vote hi form 12 hmanga vote thlak dilna, election duty tura ruat nihna appointment letter nena October ni 29 thlenga dilna lut te'n an thlak thei a ni.



TRANSPORT DEPARTMENT

Sawrkar kum kal mek 2025-26 ah Mizoram Transport department chuan thla 7 chhungin lirthei 17,656 a register thar a, he'ng zinga 13,849 chu two wheeler niin a tam ber a, lirthei register thar zawng zawng zinga zaa 78 point 44 a tling.

Transport department-in lirthei ziah luh zat a tarlan danin, kumin March ni 31 khan Mizoramah lirthei register 3,32,185 a awm laiin, thla hmasa October ni 31 khan lirthei register 3,49,841 a awm tawh a; sawrkar kum kal mekah April ni 1 atanga October ni 31 thleng khan thla 7 chhungin Mizoramah lirthei 17,656 ziah luh thar a ni tihna a ni.

Thla 7 chhunga lirthei ziah luh thar zingah hian two wheeler 13,849 awmin a tam ber a, two wheeler dawta register tam ber chu car niin 2,502 register a ni a; two wheeler leh car ziah luh zat inthlauhna 11,347 a tling a ni.

Transport department-in a tarlan danin, Mizorama lirthei register tam ber chu two wheeler a ni a, 2,43,016 register tawh niin Car 57,836, bungraw phur lirthei chi hrang hrang 24,513, auto rickshaw 6,381, four wheeler taxi 5,870, two wheeler taxi 4,121 leh maxicab 2,385 te chu a tam zual an ni bawk.



AH&VETY DEPT

Mizoram sawrkar chuan ran vulhtu, a bikin bawng, vawk leh kel vultute tan an ran vulhah livestock insurance a kalpui dawn a, tunah hian insurance kalpuitu tur company zawнна atan tender chhuah tura peihfel tawh niin, tender tih chhuah thuai tum a ni.

AH&Vety department hotute chuan Akashvani News Aizawl zawhna chhangin, National Livestock Mission (NLM) scheme hnuaiah ran insurance tihna tur project an siam thu leh sawrkar laipuiin cheng nuai 125 point 05 a rawn sanction tawh thu an sawi a; Mizoram sorkara budget allocation an dil mek chu pek an nih hunah sanction dilna an thlen anga, pawisa an hmuh hunah ran vulhtute tan insurance hi an kalpui dawn thu an sawi.

Miozram sawrkarin ran insurance kalpui a tum hi company 6-in an rawn ngaihven thu sawiin AH&Vety department hotute chuan, Insurance company hrang hrangte hian livestock insurance an kalpui thin dan leh Mizorama insurance tha tak kalpui a nih theihna tura ruahmanna an neihte sawrkarah an sawifiah tawh. Tender chhuah tura department lamin an buaipui chu an zo tawh a, remchang hmasa berah tender hi an chhuah dawn tih an sawi a ni.



MIZORAM AGRICULTURAL MARKETING BOARD

Vawiin khan Mizoram Agricultural Marketing Board chu an Chairman Chief Minister Pu Lalduhoma kaihhruaiin CM Conference Hall-ah Kumina thlai thar lei chungchang ngaihtuahin an thukhawm.

Meeting-ah hian kuminah Sawhthing quintals 3,38,354 lei a nih thu tarlan a ni a, a man pek chhuah tawh hi cheng vaibelchhe 118. 89 chuang niin la pek chhuah loh cheng vbch 20 vel a awm thu tarlan a ni a, Sorkarin sawhthing a lei zingah LPK Trip 7 chiah hralh ral lohvin a awm a. Hetianga a awm chhan chu a chhe tur ven nana thliar a ngaih vang niin Hei pawh hi leitha siam nana lei diltu an awm mek thu tarlan a ni a, A dang chu mumal taka tihral vek a ni.

Sawhthing lei leh hralh thua thil fel lo a awm leh awm loh chhuitu Investigation Team ten Champhai district an chhuichianna report an pe a. Thil dik lo an hmuhchhuahte hi sawrkarin a taka sum a la pekchhuah loh te an ni a. Hetiang harsatna hi a awm tawh loh nan ruahmanna siam niin Kumin sawhthing lei leh hralhna bikah hian Central Sorkar Market Intervention Scheme atangin Rs. 9 Cr. vel hmuhlet beisei a ni.

Kum thar atana inbuatsaihna bakah hian NITI Aayog-in sawhthing chungchang sawihona a buatsaih tura tel tur an ruat a, Buyer Seller - Meet 2025 neih dan tur te, MAMB thuam chak dan tur leh thil dangte an sawi bawk.



PTC RECRUITMENT

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn.

Akashvani Aizawl Regional News Unit chuan PTC tur hi Aizawl, Hnahthial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan November ni 14, 2025 thleng dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani dawn a, AIR News Aizawl Facebook page ah download theihin a awm bawh ang.



GST REFORMS

Prime Minister Narendra Modi a’n September ni 22 a GST rate thar a tihchhuah chuan ramchhung mipui te ah hlawkna a thlen zel a, vawiin chuan Agriculture lam a hlawkna awm te kan tarlang dawn a ni.

GST rate thar chuan ramchhung mipui te ah hlawkna thlen zel in loneiten an lei nasat em em, tractor ah chhiah lak ti tlem in zaa 12 ni thin chu zaa 5 ah tih hniam a ni a, hei hi loneituten an hnathawhna atan a pawimawh tak anih avangin kuthnathawk tute ah senso ti tlem in, phurna nasa tak a thlen a, heng bakah hian kuthnathawk tute mamawh chi hrang hrang ah pawh chhiah lak tih tlem a ni a, hei hian kawng hrang hrang ah senso ti tlem in, hmasawnna a thlen dawn a ni.

